

新纂雲南通志

盧


漢題



新纂雲南通志

盧

理題



卷



新纂雲南通志卷一百八十目錄

名宦傳三

清一

趙廷臣

李光座

張道祥

李天浴

甘文焜

趙良棟

陳必成

李興元

王繼文

蔡毓榮

范承勳

石琳

許弘勳

謝于道

吳自肅

畢忠吉

于三賢

李澄中

馬聲

石文晟

劉蔭樞

郭璫

魏方泰

李苾

郝士鐸

張允隨

楊名時

高其倬

蔣澗

陳德

賈擴基

鄂爾泰

哈元生

宮爾勸

尹繼善

陳宏謀

徐嘉賓

慶福

朱鳳英

李如柏

廖瑛

蘇爾相

王太岳

孔繼圻

屠述濂

許祖京

福康安

陳大文

王昶

汪如洋

翁元圻

王祿朋

郭琮

新纂雲南通志卷一百八十

名宦傳三

清一

趙廷臣字君鄰遼東鐵嶺人隸漢軍鑲黃旗順治二年由貢生知山

陽縣遷江寧府同知因催征逾限罷職十年

八旗通志
作九年

大學士洪承疇經

略湖廣疏薦廷臣清幹有爲授湖南兵備道十三年調本省督糧道

十五年隨師定黔授貴州巡撫明年擢雲貴總督時兵燹之餘繼以

荒歉廷臣調劑兵民不違食息性不喜繁侈每行部不過數騎甚有

不知其至者嘗上疏言滇省田土荒蕪當急招民開墾請以順治十

七年本省秋糧貸爲春種之資會吳三桂以五象進獻上命停止送

京廷臣因請概停邊貢以省解送之勞並從之以勦平土酋龍吉兆

功加兵部尙書康熙元年調浙江總督彙敘督鑿雲南荒田功加太

子少保

八旗通志作太保

八年卒賜祭葬諡清獻廕一子入監讀書入祀賢良祠

論者謂廷臣一生清節誠足與宋趙清獻公先後媲美云

參先正事略耆獻類徵滿名臣傳清史列

傳及范志阮志

按趙廷臣爲清初名臣阮岑志名宦傳僅憑案冊紀述稍嫌簡畧

茲據先正事略耆獻類徵等書增補

李光座字彥升號東園河南祥符人順治己丑進士歷知蘭均二州

經畧洪承疇疏請簡用軍前改長沙府同知以勞積遷衡州知府陞

副使十六年任雲南學政時方亂定光座丰度端凝衡鑒分明試士

得人西南文教由此振興後官至江西按察使

參范志阮志施閏章李光座墓志銘謹瑤述聞

張道祥字履吉徐州人官生康熙元年任分巡迤西道甫至即釐奸

剔弊清囹圄禁科派省役勸墾復修南安州學宮時兵火之餘經營

各府難民歸里境內奠安

參阮志耆
獻類徵

李天浴字敬茲順天

乾隆一統
志作奉天

人隸漢軍鑲藍旗康熙七年任雲南巡撫

廉明勤慎事無大小一秉乎禮除貪暴裁冗費屬吏凜然無敢犯法

者時吳三桂奏請遷徙滇民天浴力疏止之民賴以安

參鄂志嘉
慶一統志

甘文焜字仲明一字炳如其先江西豐城人後徙瀋陽隸漢軍正藍

旗順治時由筆帖式遷禮部啟心郎康熙初改大理寺少卿二年轉

順天府尹六年授直隸巡撫七年擢雲貴總督八年受事奏禁各驛

站於額設夫役外派民協助民賴休息時吳三桂鎮雲南總督駐貴

陽三桂畜異志久僭侈踰法文焜持大體多所裁抑又以時訓練步

兵申嚴紀律思制其蘖芽三桂頗憚文焜威名未即發乃詭報土番

康東入寇又陰喉凱里諸苗煽亂羽檄交馳以覘文焜措置文焜料康東無能爲凱里近在肘腋先督兵進勦陣斬賊酋破其巢餘黨悉平旋以近勦康東師期移檄雲南而三桂果以康東遠遁告文焜以滇疆遼闊疏請巡視因徧歷各府州十年三月疏言滇黔山路崎嶇且多瘴癘凡官吏卒於任者請給勘合由驛歸其櫬下部議行七月以疾求罷溫旨慰留尋丁母憂命在任守制逆苗民阿福倡亂遣兵搗其寨擒斬之再疏乞假歸葬許之十二年十月還貴陽時朝廷方允三桂撤藩之請三桂期以十一月二十四日起行陰結黨羽謀反先期三日戕雲南巡撫朱國治分遣黨羽逼貴陽文焜聞變即遣族弟文烱賈疏入告中有城存臣存城亡臣亡之語復致書川湖總督蔡毓榮趣其集兵沅州聯絡聲援先是文焜回京治喪三桂請以總

督印付雲南巡撫署理假訓練爲名盡調督標弁兵赴滇厚結之至是煽誘潰散莫聽文焜調遣文焜急牒提督李本深領兵扼盤江上流以拒賊適本深以書來覘文焜意中多遁辭文焜手書答之略曰吾輩忠孝自矢建樹正在今日尙其同心協力手足相依萬一不濟惟有效張巡南霽雲以身殉國若稍二三其德遺馨遺臭千里毫釐也而本深與黔撫曹申吉已從賊文焜見諸將吏無一可與謀者度貴陽不能守惟鎮遠地勢險阻外可號召荆楚之兵內可抗拒黔滇之隘力遏凶鋒事猶可爲因令妾盛氏率婦女等七人自經死文焜即馳赴鎮遠至則守將江義已反戈相待文焜揮鞭渡河抵吉祥寺義以兵環之文焜下馬歎曰封疆之臣義死封疆過此則非黔地矣整衣冠望闕再拜遂自刎死年四十有二子國城及筆帖式和善雅

圖從死焉文焜殉節後鬢髯蝟張雙目猶視生氣凜凜士民見者皆
殞涕遂共殮瘞於寺側後吳亂平上遣其長子宣化府同知國均迎
櫬還京至日遣大臣迎奠贈兵部尙書賜祭葬諡忠果廕子國璧入
監二十五年建專祠於貴陽御書勁節額其祠五十四年國璧撫滇
復允滇人士請建專祠於滇垣雍正時入祀昭忠祠

參碑傳集先正事略耆獻類徵
滿名臣傳清史列傳及阮志

按甘文焜官總督時政績甚多范鄂志固失之略即阮岑志憑採
訪紀述亦未詳備茲據碑傳集先正事略耆獻類徵等書增補

趙良棟字擎宇

張玉書嚴虞惇撰
墓志銘作擎之

一字西華甘肅寧夏人少倜儻仗策從戎

順治二年受知於總督孟喬方署潼關守備十三年以經略洪承疇
薦隨征貴州雲南任督標副將康熙元年擢雲南廣羅鎮總兵先後
勦平馬乃隴納水西諸苗僉有功時吳三桂專制滇南所補用官吏

詔部臣不得掣肘於是三桂調良棟貴州平遠鎮令進勦水西良棟方丁外艱且知三桂有異志力辭三桂怒欲劾誅之總兵沈應時爲巽詞以解四年水西平乃聽終制三桂未反時日以牢籠人才爲務惟良棟不爲所用十三年吳三桂叛平涼兵變命良棟爲寧夏提督馳傳鎮撫隴右輯寧良棟念滇亂未除漢南巴蜀阻聲教請由川蜀出師獨當一面許之十八年以復徽縣略陽功授勇畧將軍兼寧夏提督十九年以復成都功擢雲貴總督加兵部尙書銜仍管將軍事而以良棟子宏燦爲寧夏總兵官隨軍進勦良棟奏滇黔恃蜀爲捍蔽今蜀已得而三桂又新死宜乘機急進二十年三月良棟遣子宏燦及總兵李芳述等追勦胡國柱於觀音巖十丈孔五月破關山象嶺渡瀘江叙瀘永寧賊皆遁七月取建昌乘勝渡金沙江九月抵滇

時貝子彰泰軍滇池將軍賚塔軍黃草壩滿漢兵十萬有奇圍城九月未下良棟至即詣貝子陳三策其一先破外護使賊匹馬不得出乃可招降其一結營遼遠賊得番息法當移軍逼之其一降者宜分別收養不宜盡發滿洲爲奴貝子不悅以滿洲語相駁詰良棟漢人不解滿語張曰牴牾幸已奏聞詔下悉如良棟策乃率所部親冒矢石取玉皇閣進逼新橋賊據橋死拒良棟伏馬兵於南壩兩岸分步兵爲三隊營壕牆外持大刀督陣夜二鼓攻橋賊殊死鬪逆渠魁郭壯圖親搏戰三進壕牆而伏兵三起應之復以計從上流濟師列炬如星槍礮雨下賊敗走良棟奪橋追至三市街再敗之天猶未曙也黎旦入東南二門壯圖自焚世璠自殺餘黨悉降自良棟至軍八日而雲南平賊踞滇久私斂充物諸將爭取子女玉帛惟良棟飭所部

勿以一騎入城既告捷即疏請陞見移師曲靖以待命又訪得世璠
司筦庫者以藩宮簿籍進呈其後乾沒者皆敗而三桂寵姬一歸將
軍穆占一歸總督蔡毓榮者皆上聞惟良棟嶢然不滓其遠識確守
卓然有古大臣風烈焉二十一年奉詔還京三十四年授爵一等子
三十六年三月卒年七十有七上命皇長子臨其喪賜祭葬諡襄忠
雍正八年入祀賢良祠乾隆四十七年晉一等伯世襲罔替

參漢名臣傳碑
傳集先正事略

耆獻類徵
清史列傳

按討伐吳三桂趙良棟之功居多而克復雲南時其清操尤不可
及惜乎鄂阮岑諸志不能詳細紀述垂示後人殊爲遺憾茲據漢
名臣傳碑傳集先正事略等書增補

陳必成浙江人進士康熙九年爲雲南督學道僉事性介屹立如山

嶽清方亮直不懼要津

阮志

李興元字若始遼東人

原籍直隸遵化州

隸漢軍鑲黃旗順治五年由拔貢除沙

河知縣康熙十年

阮志作十一年

累遷至雲南按察使方正執法嚴抑藩兵不

許違禁取利及準折民間子女部民德之十二年吳三桂叛脅興元

降備極窘辱興元神色自若厲聲斥責三桂杖之並家屬下獄拘禁

六年終不屈十八年三桂死其孫世璠始釋興元安置蒙化十九年

清兵入黔賊勢日蹙適海潮龍倡義於北勝賊黨恐興元深得民心

爲彼後患命其僞副將劉某至蒙化縊殺之興元正襟端坐目不少

動向北而逝明年興元子蔭秀奇秀亦遇害雲南平贈太常寺卿廕

一子入監讀書二十七年崇祀名宦雍正七年入祀昭忠祠乾隆十

六年加賜恩騎尉世襲罔替

參范志鄂志阮志及先正事略張錦蘊雲南按察使李公傳

王繼文字在茲謹瑤述開作在燕漢軍鑲黃旗人由官學生考授宏文院編修順

治十一年遷兵部督捕副理事官十二年考選御史巡按陝西康熙

十三年累遷至雲南布政使八旗通志作十四年時吳三桂反隨軍進征二十年擢

雲南巡撫疏言滇省迤東西相距遼遠向設守巡道八員康熙六年

裁併今大兵雲屯軍情緊要宜復設臨元道一員駐臨安兼轄潯江

廣西廣南元江開化等府洱海道一員駐楚雄兼轄姚安武定景東

等府二十一年疏言雲南省城東南舊有金汁等河從松華壩受盤

龍江水繞昆明縣北而東而南過雲津上橋入昆明池兩岸築堤高

二三丈水流其中蜿蜒六十餘里有壩有閘有過水涵洞蓋以積水

溉田城外數十萬頃皆藉其利上年大兵圍困遺孽週築壕塹不得

不毀以致灌漑不通田畝荒蕪居民失業昆明額賦莫可催征自克

城至今臣多方招徠而流離之衆見此膏腴咸成棄土未免趑趄不
返臣愚以爲河壩不修殘黎勢難歸業荒田不墾額賦何征已檄官
勘估需工料銀二萬餘兩擬請于通省官員及各屬土司酌行捐助
懇勅部酌議捐銀若干准予紀錄以此捐項修築河壩水利旣通殘
氓樂業糧賦可以復舊均下部議行二十五年以母憂去官二十八
年復任雲南巡撫二十九年疏言雲南黑井鹽課吳逆月增課銀二
千兩臣于二十一年請將歲增課銀暫除今部議復征而現今戶口
所增無幾食鹽甚少請照豁免則井竈商民均安樂利又疏言滇省
屯田一畝之科幾納民田十倍之賦拖欠逃亡年甚一年臣自再蒞
此土訪求民隱惟此最爲滇民苦累今議現納軍糧人承墾者將屯
田地上中二則六年後悉改爲民田地下則起科屯田地下則十年

後改爲民田地。下則起科。其不係現納軍糧人承墾者。六年後將屯田地上中下則悉改爲民田地。上中下則起科。仍量借牛種務使力耕有成。至民間荒廢田地。原主逃亡及不願開墾者。不論何人承墾。即爲己業。其上中二則仿豫省例。六年後係中則者。照下則納三年。再歸中則。係上則者。照下則納五年。再歸上則。起科其下則田地。請于六年後減半。又三年再照本則起科。三年內一應雜差。均予豁免。庶民累少。甦民情思。奮正額。可充新賦。亦可少增。三十三年擢雲貴總督。三十七年疏言。魯魁一山與哀牢相接。綿亘千餘里。今賊首擦捏雖滅。餘黨猶存。新甯一營孤懸賊窟。請設汛增兵。彈壓要害。均如所請施行。是冬入覲。以老病乞休。詔令原官致仕。四十二年五月卒。賜祭葬如例。雲貴軍民共請崇祀名宦祠。

參碑傳集著獻類徵滿名臣傳及阮志唐志